

EURO 2008/15




Y bi so richtig Stolz uff mii
gueti Aarbeit isch das gsii
e Fuessballfescht, wie us em Buech
us vyyle Länder hooche Bsuech
us Wiirtschaft, Spoort und Bolytygg
me kaa scho saage «daas isch schygg!»
Jä VIPs, die mues me pflääge
die lemmer sicher nit im Rääge
stoo – am Ändi sinn sy nass
so macht doch Fuessball gaar kai Gspass!
Drum hämmer – hinter Glaas versteeggt
e riise groosses Buffet deggt.

Deert spyse sy so richtig guet
und waas sich uff em Raase duet
isch deert eenter Nääbesach
sy sinn halt sälber nit vom Fach!
Doch aigedlig isch daas egal
wichtig isch jo numme d Zaal
wo uff em Schegg in dungglem root
unde linggs im Egge stoot.
E Groossaloss – das muesch verstoo
wuurd ooni dääne schlicht nit goo
denn au yych – das gseesch jo yy
währ ooni Loon do nit debyy!

So luege miir – als schlau Gselle
dass mer Hälfer kenne bstelle
wo do graatis schaffe dien
und mer soo nyt zaale mien!
So blybt fir uns no mee im Dofp
das stygt is sicher nit in Kopf
mer griege doo zweor Mylioone
aber biete dääne Regioone
d Meegligkait sich z presentiere
sy mieste sich nur engagiere.
E soone Chance – die mues me nää
die duet s jo bstimmt nit zwaimool gää

und alli dien do brofitiere
d Gschäfter joorelang floriere
bis iiber d Gränze macht s bikannt
d Regioon – jä, s ganze Land!
Drum kenne miir au nit bigryffe
wysoo sich gwissi druff verstyffe
d Euro bringi uns nit vyyl
d Koschte schiessen iibers Zyy!
Zaale liesse mer der Staat
dää machi sicher Gäld baraatt
der Gwinn jedoch wuurd äär – per see
nit emool vo wytem gsee!



PLETZLIG SCHWAARZ

JOKER Post Lux Tenebras

Mer hänn do grad die bescht Ydee
das wämmer hit vo noochem gsee
Waas sy deert im CERN so drybe
soll is nit verboorge blyye.
Drum faare miir grad kuurzerhand
mit Sagg und Phagg ins Gänferland.
Unterwäggs wiird spekuliert
will s is halt so intressiert
waas sy deert wänn usefinde
ep sy s Wältbild nei ergrinde.
Do maint der Aint «y waiss es doch
die baschtle deert eschwaarzes Loch!» mer fäage denn dur jeedi Strooss

Eschwaarzes Loch wärscho no braggtisch
me kennt dermit jo denne faggtisch
entsoorge waas me nimme wott
waas me lengscht vernichte sott.
Byspüll git s derzue in Masse
luegscho numme doo in d Gasse
Abfall wo nit aane gheert
e mänge scho im Nääslisteert
grad z Napoli wäär jeede froo
hätte sy scho ains bikoo!
S Botenziaal isch riisegrooss



suugen yy an jedem Egge
s Schlächte wo mer deert entdegge.
Bolytiker wo numme bschysse
alli Macht wänn an sich rysse
die wo d Wiirtschaftsgryyse staarte
aaber nomee Gäld erwaarte
Mensche wo dien Kinderschände
unds grad live im Netz dien sände
s CO₂ wo s Klyymablogt
d Kue wo fuurzt und gaar nit frogt!
Au an der Fasnacht hätt s sy Zwägg
schlächti Sujets - zagg - ewägg!

Jetz simmer deert und schlyychen yne
s isch niemer doo - so wie s duet schyyne
so steemer voor däm groosse Pult
miir Joker Binggis sinn bald kult
als Retter glyy scho wältberiemt
wenn numme niemer yne kiemt!
E roote Gnöpf - dää gfällt is guet
ep me s doo äggscht staarte duet?
Mer drugge druff - e groosse Gnall
d Wält schyynt wie im freie Fall!
Was hämmer gmacht? S isch nimmi Gspass!
Daas isch s Änd - «Post Lux Tenebras»